

# Pániko na Famia Planiá

Famia Planiá ta ku man na kabes! Kuminsando otro siman, nan lo mester kobra pa kada kondon i píldora pa prevení emba-raso ku ser solisitá na su buro. Pues, no por haña kondon ku “pil” gratis mas.

Motibu pa esaki ta pasobra e empresa britaniko ku kende Famia Planiá tin kontrakto pa por haña antikonseptivonan por-nada no ta konsiderá Kòrsou un pais di terser mundu. Komo resultado, e empresa ta bai manda e kondon i píldora gratis na paisnan di Afrika i Asia. Famia Planiá no tin e rekursu finansiero pa sigui parti antikonseptivonan sin kobra.

Nan ta ku man na kabes pasobra awor nan ta spera un ou-mento drástiko di embaraso hubenil i un oumento den enfer-medat seksual. Ku rason nan ta antisipá esaki pasobra e ta e re-sultado natural di e filosofia ku kua nan mes a indoktriná nos islanan.

Aparentemente e “ekspertonan di seksualidat” a kai den e trampa di nan mes filosofia. Talbes nan a avisá hóbennan ku sèks deskabeyá ta peligroso. Talbes nan a duna di konosé ku embaraso fásilmente por resultá di un aventura romántiko. Ma tòg nan a sigui promové relashon intimo. Kon? Dor di ofresé kondon i “pil”.

Bo por bisa bo yu hóbennan ripitidamente pa evitá relashon inti-mo. Ma ora bo dun’é un kondon, bo ta kontradisí bo mes men-sahe. Bo ta komuniká n’é “dal bai tòg...e pida latèks lo prote-hábo kontra tur pusibel konsekuensia desfavorabel.” Ta méskos si bo ta atvertí bo yu di tres aña pa no hunga ku lusafè. Anto un dia bo mes ta dun’é un kaha di lusafè. Bo ta dunando un men-sahe miksto: no hunga ku lusafè; bo por hunga tòg ku lusafè!

Semper e filosofia “kondon t’é solushon” a laga di deseá. Awor ku no por haña e salbabida di latèks gratis mas, nan ta ku man na kabes pasobra segun nan filosofia, mundu ta kaba si no tin kondon! E solushon no t’ei mas!

**Ma tin un solushon** ku ta fásil pa komprendé! No tin ku warda pa un empresa na otro parti di mundu mand’é pa nos islanan. No tin ku buska sponser ku lo para tras di e filosofia ku tòg no a redusí embaraso i enfermedat venérikiko. E solushon aki lo no kosta gobièrnu ni un depchi.

Brutu bisá, e “filosofia di kondon” ta pinta hende komo un chubatu ku ora su instinto ta pidi, e **mester** bula riba un kabritu muhé. E filosofia aki ta hasi nos un komunidad di bestia.

Ma nos no ta bestia. Nos ta hende. **I hende por ehersé disiplina propio.** Esaki ta presis e solushon: Apstené di tur aktividat seksual te dia ku bo kasa, kasa ku un persona no-infektá ku un enfermedat venérikiko, anto keda fiel na bo kasá. Siguiendo e plan ei, ta kasi impusíbel pa kontagiá un enfermedat venérikiko i embaraso hubenil lo pasa pa olvido. Esaki ta e men-sahe ku nos mester proklamá ripitidamente na bos haltu.

Nos gobièrno tampoko ta responsabel pa finansiá e filosofia falsu aki. Ta ridíkulo pa gobièrnu òf un sponser hasi donashon pa hende sin disiplina propio por djòdjò. Anto atrobe gobièrnu tin ku saka sèn pa tratamentu médiko ora nan kontagiá un enfer-medat ku nan por a evitá si nan a ehersé disiplina propio.

Esun ku a krea nos i sa kon hende lo por funshoná optimal ke nos bon. No ta pornada ku un di e Dies Mandamentunan ta deklará: “*No kometé adulterio*” (Eksodo 20:14). No ta pornada ku Dios ta bisa “*apstené boso di inmoralidat seksual*” (1 Tesa-lonisensenan 4:3).

Si nos sigui e preskripsjon di nos Kreador, nos gobièrnu por spar sèn, nos poblashon lo ta mas salú, i Famia Planiá lo no ta ku man na kabes!